

Inatsisissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiineq

Atuagaateqarfeqarneq pillugu inatsisip atuuttup 1979-imeersup ullutsinnut naleqqukkunnaartutut isigineqarnera tunngavigalugu siunnersuut saqqummiunneqarpoq. Atuagaateqarfiit ullumikkut qaammarsaasernerup, ilinniartitsisarnerup kulturikkullu ingerlatsinerit siuarsassavaat, kisiannili atuakkanik, atuagassianik atortunillu naqitanik allanik atugassanngortitsiinnartarnikkut tamanna pisinnaangilaq. Atuagaateqarfiit piffissami digitaleqarfiusumi inuiaqatigiinni paasissutissinneqartarnermik ilisimasaqarnermillu tunngaveqartuni annertusiartupiloortumik paasissutissanik pilersitsisarnermik paasissutissanillu tamanik annertusiartortumik atuisarnermik ilisarnaateqartuni inuiaqatigiinni suliaqarfittut pingaartutut inissisimapput. Amerlanerusut ajornannginnerusumik paasissutissanik amerlanerusunik maannakkut pissarsisinnaanerit tassunga ilanngunneqassaaq.

Atuagaateqarfiit neqeroorutaasa tamanna tunngavigalugu inuiaqatigiit avatangiisusut takutissavaat, tassani teknologi atorlugu tusagassiiviit ineriartornerat innuttaasut atueriaasiannik pisariaqartitaannillu nutaanik pitsaassuseqartitsilernikuulluni.

Taamaammat atuagaateqarfiit suli innuttaasunut pilerinartunik ullutsinnullu naleqquttunik neqerooruteqarnissaat innuttaasullu akornanni saqqumilaarnissaat pingaartuuvoq. Ullumikkut ilisimasaniq assigiinngitsorpassuarnik pissarsivissaqarmat, atuagaateqarfiit atortunik sunik atugassiisassanerannut aamma piumasaqaaterpassuaqarpoq, assersuutigalugu nipilersuutiniq tusagassiiviit elektroniskimillu paasissutissiisarfiit. Tamanna ilaatigut inatsisip atuuttut tunngavigalugit pinngitsoorani tunniussisussaataaneq pillugu aalajangersakkat annertusinissaannik annertunerusumik pisariaqartitsisoqalerpoq, taamaalilluni naqitat kisimik pineqaratik aammali elektroniskimik saqqummersitat ilanngunneqassallutik. Tamanna pivooq immikkoortumi ineriartornerup inatsisitigut malinnaatinneqannginnera nassuerutigalugu. Tamanna aamma assersuutigalugu internetimi neqeroorutinit allanut tunngatillugu atuuppoq, aammalu atortut suut atugassanngortinneqarnissaat pillugu malittarisassani atuuttuni aamma tappiitsut isigiarsuttullu naalaagassanik pisariaqartitsinerat isiginiarneqarnani. Atuagaateqarfimmi tunngaviummik suliaasaat tassaavoq paasissutissanik annertusiartuinnartumik kikkut tamarmik pissarsisinnaanissaat qulakkiissallugu.

Aalajangersakkat arlallit ataatsimut isigalugu nutarterneqarnissaasa qulakkeerneqarnissaanik pisariaqartitsisoqartoq tassunga peqatigitillugu paasineqarpoq, soorlu inatsimmi atuuttumi pingaarnertut aaqqissuussaanaera ingerlatiinnarniarneqarluni. Tamanna isumaqarpoq assersuutigalugu killeqanngitsumik atorniarsinnaatitaanerup akeqanngitsumillu atorsinnaanerup ingerlatiinnarnissaat tunngaviusumik tunngaveqartoq. Atuagaateqarfinnik atuinerup akeqannginnera kikkullu tamarmik atuisinnaanerat minnerunngitsumik atuagaateqarfiit inuiaqatigiinni pingaarnertut ingerlatsivigisaanni ataqatigiilersitsisarnerannut tunngatillugu tunngaviusumik atugassaqaqtitsinertut pingaartutut isigineqarpoq.

Tamassuma saniatigut oqaatigineqassaaq bibliotekeqarneq pillugu landstingip peqqussutaanut atuuttumut kingullermik 2005-imi upernaakkut allanngortinneqartumut allannguutissatut siunnersuuteqarani siunnersuut Namminersorlutik Oqartussat malittarisassiortarneranni najoqqutassiat atuuttut malillugit suliarineqartoq.

2. Inatsisissatut siunnersuummi immikkoortut pingaarnerit

a) Inatsisit atuuttut

Atuagaateqarfeqarneq pillugu inatsit atuuttoq salliutillugu tassaapput Bibliotekeqarneq pillugu Landstingip peqqussuta nr. 4, 15. oktober 1979-imeersoq, Inatsisartut peqqussuta nr. 13, 30. oktober 1992-imeersukkut allanngortinneqartoq aamma Bibliotekeqarneq pillugu Inatsisartut peqqussutaata allanngortinneqarneranik Inatsisartut peqqussuta nr. 5, 12. maj 2005-imeersoq. Tamassuma saniatigut inatsit atuuttoq tassaavoq Atuagaateqarfimmiittuuteqarnermut akissarsiasat pillugit Namminersornerullutik Oqartussat nalunaarutaat nr. 15, 5. oktober 1999-imeersoq.

Inatsisartut peqqussutaanni atuuttumi ersippoq saqqummersitanik naqitanik suliarinnittut inatsimmi pinngitsoorani tunniussisussaataaneq naapertorlugu pingasunik Nunatta Atuagaateqarfianut tunniussissasut, kisiannili atortut soorlu videot, cd-t, cd-rommit dvd-illu ilaatinneqaratik.

Tamassuma saniatigut atuagaateqarfiit naalaagassanik atugassanngortitsinissamik pisussaaffeqarnerat inatsimmi atuuttumi erseqqarissumik killilersorneqanngilaq, aammalu atuagaateqarfinni internetersinnaaneq pillugu apeqqut atuagaateqarfiit pillugit malittarisassani taaneqarnikuunani. Inatsimmi atuuttumi tassunga peqatigitillugu atuagaateqarfinni aqutsisutut atorfiit inuttalerneqartarnerannut tunngatillugu pisinnaasat pillugit piunasaqaateqartoqanngilaq. Aammattaaq oqaatigineqassaaq atuagaateqarfinni suliamik ingerlatsinermi suleqatigiinneq pillugu aalajangersakkat kommunit killingi taamanernisat aallaavigalugit suliarineqarnikuupput.

b) Siunnersuut

Akiliinani kiffartuunneqarsinnaanermik periutsimik taaneqartartoq ingerlatiinnarneqarpoq. Tamanna isumaqarpoq nammineq takkulluni atuagaateqarfinni killeqanngitsumik atuisoqarsinnaasoq atortullu akiliisitsinani innuttaasunut atortinneqarsinnaasut.

Nunatta Atuagaateqarfiata inatsisini taamaallaat atuagaateqarfiup pisortatigoortumik atugaanik taaguuteqarnissaa, tassa Nunatta Atuagaateqarfia, pissusissamisoortut isigineqarpoq.

Siunnersuut kommunit maannakkut killiinut aamma naleqqussarneqarpoq. Tamassumunnga pissutaavoq Nunatta Atuagaateqarfiata malittarisassat atuuttut naapertorlugit suliassai kommunit killingi taamanernisanut tunnganeri.

Siunnersuutip aammattaaq aalajangersarpaa, pingaarnernut atuagaateqarfinnut immikkoortortanik pilersitsinissamik sumiiffinni aalajangersimasuni pisariaqartitsisoqarnersoq nalilersuisoqarnerani kommunalbestyrelsit suut pingaartissaneraat.

Nunatta Atuagaateqarfiani kommunillu atuagaateqarfiini aqutsisut pisinnaasassaannik piunnaasaataanik siunnersuut aamma imaqarpoq. Atortut atugassanngortinneqartut pitsaassuseq, tamatigoortuuneq pissusiviusumillu tunngaveqarneq pillugit isumaliutinik tunngaveqarnissaat pillugu siunnersuummi siunertanut naapertuunnissaasa qulakkeerneqarnissaa siunertaralugu ilanngunneqarput.

Tamassuma saniatigut Groenlandicami katersugaatinut tunngatillugu erseqqissaatinik siunnersuut imaqarpoq, tassunga ilanngullugit innuttaasut katersugaatinik ilisimatusarnerillu pillugit atuagaateqarfimmik atuisinnaanissaasa qulakkeerneqarnissaa. Aammattaaq tassunga tapiliullugu erseqqissarneqarpoq ilisimasanik misigisassanillu Nunatta Atuagaateqarfia ingerlatitseqqiisassasoq.

Siunnersuutigineqarpoq atuagaateqarfimmiittuutisiat pillugit malittarisassat tamatigoornerulissasut siunissamilu atorneqarsinnaassasut, tassa inunnik pisinnaatitaaffeqartunik allaaserinneq tamakkiisuujunnaarnikummat. Tassunga peqatigitillugu atuagaateqarfimmiittuutisiat pillugit malittarisassiorsinnaanermut pisinnaatitsisoqarpoq.

Pinngitsoorani tunniussisussaataitanermik aalajangersakkap annertusineranik siunnersuut aamma imaqarpoq, tamassuma kingorna atortut naqitaanngitsut aamma ilanngunneqarlutik, siunnersuummilu naalaagassanik assersuutigalugulu paasissutissiivinnut elektroniskiusunik atuagaateqarfiit atugassanngortitsisarnissamik siunnersuummi aamma pisussaaffilerneqarput. Pinngitsoorani tunniussisussaataitanerup unioqqutitsineqarnerani pineqaatissiissutit pillugit inatsillu naapertorlugu malittarisassanik unioqqutitsinerit pillugit malittarisassiorsinnaanermut Naalakkersuisut aammattaaq pisinnaatitaaffilerneqarput, tassunga peqatigitillugu naapertuuttut isigineqarpoq periarfissaliisummik ilanngussisoqassasoq Naalakkersuisut inatsimmi pinngitsoorani tunniussisussaataitanermut aalajangersakkamik unioqqutitsinermi

pineqaatissiissutiniq aammalu inatsisit malillugit malittarisassanik atulersinneqarnikunik unioqquitsinermi tunngavissalorsinnaanerannut.

Aningaasalersuisarneq ingerlatsinerillu isertitsissutaasartut pillugit aalajangersakkatigut erseqqissaassutiniq siunnersuut aamma imaqarpoq.

Inatsisartut peqqussutaannut atuuttumut tunngatillugu oqaasertanik allannguutiniq arlalinnik siunnersuut tassunga peqatigitillugu imaqarpoq.

3. Pisortanut aningaasatigut allaffissornikkullu kingunissai

Soorlu aallaqqaasiinermi oqaatigineqartoq inatsimmut atuuttumut tunngatillugu arlalinnik naleqqussaaniissap qulakkeerneqarnissaa siunnersuummi siunertaavoq, taamaalillunilu atuagaateqarfeqarnermi pissusivinnut naleqqussaasoqarluni. naalaagassat paasissutissiiviillu elektroniskiusut atugassanngortinneqartalernikuupput. Ilimagineqarpoq pinngitsoorani tunniussisussaataaneq pillugu aalajangersakkap annertusineqarnera Nunatta Atuagaateqarfianut annikitsumik sipaarutaassasoq, tassa Nunatta Atuagaateqarfia nammineerluni naqitat saniatigut saqqummersitanik allanik maannamut pisisarmat.

Ilimagineqarpoq ilisimasanik misigisanillu ingerlatitseqqiisarneq pillugu aalajangersagaq aningaasatigut kinguneqassanngitsoq, tassa ingerlatat ullumikkut ingerlanneqartareersut pineqarmata.

Ilimagineqarpoq pitsaassutsimik siunnersuummi piumasaqaat aningaasatigut kinguneqassanngitsoq, tassa tamanna periusaareersumik aalajangersaanerummat.

4. Inuussutissarsiortunut aningaasatigut allaffissornikkullu kingunissai

Siunnersuut inuussutissarsiortunut aningaasatigut allaffissornikkullu toqqaannartumik kinguneqassanngilaq, kisiannili saqqummiussanik naqitaanngitsunik pilersitsisut pingasunik Nunatta Atuagaateqarfianut tunniussisassapput.

5. Avatangiisinut, pinngortitamut innuttaasullu peqqissusaannut kingunissai

Siunnersuut avatangiisinut, pinngortitamut innuttaasullu peqqissusaannut imaaliinnarluni kinguneqassanngilaq.

6. Innuttaasunut kingunissai

Ilimagineqarpoq siunnersuut innuttaasunut isigiarsuttunut pitsaasumik kinguneqassasoq, tassa atuagaateqarfiit naalaagassanik paasissutissiisarfinnillu elektroniskinngorlugu atugassanngortitsisarnissamik pisussaaffilerneqassammata.

7. Kingunissai pingaaruteqartut allat

Ilimagineqarpoq siunnersuut pingaaruteqartunik allanik kinguneqassanngitsoq.

8. Pisortanut kattuffinnullu tusarniaaneq

Siunnersuut piffissami 11. december 2013-imiit 6. januar 2014-imut ukununga tusarniutigineqarpoq:

Naalakkersuisut Siulittaasuata Naalakkersuisoqarfia
Ineqarnermut, Pinngortitamut Avatangiisinullu Naalakkersuisoqarfik
Aningaasaqarnermut Nunamullu Namminermt Naalakkersuisoqarfik
Aalisarnermut, Piniarnermut Nunalerinermullu Naalakkersuisoqarfik
Inuussutissarsiornermut, Aatsitassaqaqarnermut Suliffeqaqarnermullu Naalakkersuisoqarfik
Ilaqtariinnermut Inatsisinillu Atortitsinermt Naalakkersuisoqarfik
Peqqissutsimut Attaveqaqarnermullu Naalakkersuisoqarfik
Nunamut Namminermt, Pinngortitamut Avatangiisinullu Naalakkersuisoqarfik
Nunanut Allanut Pisortaqaqarfik
Kalaallit Atuakkiortut
SIK
Kalaallit Nunaanni Sulisitsisut Peqatigiiffiat (GA)
KANUKOKA
KANUNUPE
NUSUKA
IMAK
Perorsaasut Ilinniarsimasut Peqatigiiffiat (PIP)
AK
ASG (Akademikernes Sammenslutning i Grønland/Ilinniagartuut Kattuffiat)
Ilisimatusarfik
ICC
EPI
Nunatta Atuagaateqarfia
Maanuup Atuakkiorfia
Atlantic Music
Iperaq
Milik Publishing
Inuk Media
Tusaat TV
Forlaget Atuagkat

Tusarniaanermi akissutinik ukunannga nassiussisoqarpoq:

Aningaasaqarnermt Nunamullu Namminermt Naalakkersuisoqarfik, Aalisarnermt,
Piniarnermt, Nunalerinermullu Naalakkersuisoqarfik, Inuussutissarsiornermt,
Aatsitassaqaqarnermt, Sulisoqaqarnermullu Naalakkersuisoqarfik, Ilaqtariinnermt Inatsisinillu
Atortitsinermt Naalakkersuisoqarfik, Peqqissutsimut Attaveqaqarnermullu

Naalackersuisoqarfik, Kalaallit Atuakkiortut, Ilinniagartuut Kattuffiat (ASG), Ilisimatusarfik, Nunatta Atuagaateqarfia, Atuagkat, KANUKOKA immikkut Kommuneqarfik Sermersooq oqaaseqaatai ilanngullugit.

Tusarniaanermi akissuteqaatit siunnersuummik allannguinissamik tunngavissiiingillat, taamaallaallu oqaaseqaatinut ataasiakkaanut ersarissaanermik ilanngussinermillu kinguneqarlutik.

Aalajangersakkanut ataasiakkaanut oqaaseqaatit

§ 1-imut

Bibliotekeqarneq pillugu Inatsisartut peqqussutaanni atuuttumi § 1-imik ilaatigut ingerlatitseqqiineruvoq, aalajangersagaq taamaalilluni inatsisartut peqqussutaanni atuuttumi § 2-mik ilaneqarpoq. Atuagaateqarfiit pillugit pingaarnertut siunertaasa allanneqarnissaat siunertaralugu siunertaq pillugu aalajangersakkap ingerlatiinnarneqarnissaa naleqquttuusooq nalilerneqarpoq.

Imm. 1-imut

Aalajangersagaq imarisamigut Inatsisartut peqqussutaanni § 1-ip ilaatigut assigaa, atuagassiat, naalaagassat paasissutissiiviillu elektroniskit ilanngunneqarlutik. Kingullertut taaneqartoq assersuutigalugu tassaasinnaavoq atuagaateqarfiit atortunik USB-stikkimut toqqorsisarnerat imaluunniit atuagaateqarfimmi internetimik atuisinnaatitsinerat.

Imm. 2-mut

Aalajangersagaq Inatsisartut peqqussutaanni atuuttumi § 2-mik issuaaneruvoq, atuagaateqarfiillu toqqaasarneranni imarisaatigut piunasaqaatit pillugit annertussutsit allaqqallutik. Aammattaaq aalajangersakkami oqaaseqaatit aappaanni ersippoq assersuutigalugu upperisarsiornermi tunngaviit atortunik toqqaanissamik isumaliuteqarnermi ilaatinneqarsinnaasut, tassa tunngaviit taakku toqqaanermi aalajangiisuunngippata. Innuttaasut ataasiakkaat namminneerlutik isummersorsinnaanermut periarfissaasa immikkut isiginninniarnermi killilerneqannginnissaat aalajangersakkami siunertaavoq.

§ 2-mut

Aalajangersagaq nutaajuvoq pisortallu atuagaateqarfinnut akisussaaffeqarnerat aalajangersarneqarluni.

Pineqartut tassaapput inuiaqatigiinni pissutsit immikkut ittut takutinnaarlugit nalunaarutit, nalunaarutillu piviusorsioruusussat kinaassusersioruusanningsullu. Pisortat nalunaarutaasa pineqarnerannut tunngaviuvoq nalunaarutit pisortani oqartussat sinnerlugit nalunaarutigineqartarnerat.

Paasissutissiissutini innuttaasut pisinnaatitaaffii pisussaaffiilu nalunaarutini pineqarsinnaapput, tassunga ilanngullugit assersuutigalugu malittarisassat nutaat eqqumaffigisassat, nalunaarutinilu pineqarsinnaapput inuit atugaanni peqqissutsimilu pissutsit, angallanneq, avatangiisit. Paasissutissiinerni aamma siunertaasinnaavoq peqqissuseq isumannaallisaanerlu pillugit paasissutissiissutit assigiinngitsut tapersernissaat imaluunniit

innuttaasut siunnersorneqarsinnaanerat ilitersorneqarsinnaanerallu pillugu paasissutissiissutinik imaqarsinnaallutik.

Aalajangersakkap imarisaa assersuutigalugu allagartaliinikkut imaluunniit atuagaateqarfiit nittartagaasigut piviusunngortinneqarsinnaavoq.

§ 3-mut

Aalajangersagaq Inatsisartut peqqussutaanni atuuttumi § 3-mik ilaatigut ingerlatitseqqiineruvoq.

Aalajangersakkami takuneqarsinnaavoq nutaatut inersimasunut meeqqanullu immikkoortortaqaarnissaanik piumasaqaateqarneq ilaatinneqanngitsoq. Taamatut piumasaqaateqarneq peerneqarpoq erseqqissarniarlugu inersimasunut meeqqanullu immikkoortortanik pilersitsinissamik taamaallaat pingaarnernut atuagaateqarfinnut atuuttoq, § 5-imi tamanna aalajangersarneqarpoq. **Uunga**

Tassunga oqaatigineqassaaq innuttaasunut atuagaateqarfiit allaffissornermi aningaasaqarnermilu kommunalbestyrelsit pineqartut toqqaannartumik ataaniittut.

§ 4-mut

Aalajangersagaq Inatsisartut peqqussutaanni § 4-mik ingerlatitseqqiineruvoq, kisiannili aalajangersakkami imm. 3 nutaajuvoq.

Imm. 1-imut

Aalajangersakkami oqaasertat siulliat Inatsisartut peqqussutaanni atuuttumi § 4-imik ilaatigut ingerlatitseqqiineruvoq. Tassani kommunini atuagaateqarfiit aaqqissuussaanerisa pitsaassusaasa minnerpaaffissaat allaqqavoq. Nutaatut kommunimi sumiiffimmi aalajangersimasumi immikkoortortamik pilersitsisoqarsinnaaneramik nalilersuinermi kommunalbestyrelsit sunik pingaartitsissanersut pillugu aalajangersagaq ilanngunneqarpoq. Innuttaasut amerlassusaat oqaatigineqarpoq, tassa tamanna qanoq annertutigisumik pisariaqartitsisoqarneranik nammineq takutitsisuummat. Tamanna sumiiffimmi atuagaateqarfeqarnermut tunngasutigut pigineqartut tunngavigalugit ataqatigitinneqassaaq. Atuagaateqarfeqarnermut tunngasunut suliarinninneq assersuutigalugu tassaasinnaavoq meeqqat atuarfianni atuagaateqarfik imaluunniit atuagaateqarfik nuunneqarsinnaasoq.

Imm. 2-mut

Aalajangersagaq Inatsisartut peqqussutaanni § 3, imm. 2-mik ilaatigut ingerlatitseqqiineruvoq, tassani allaqqalluni Nunatta Atuagaateqarfia Nuup Kommuniani innuttaasunut atuagaateqarfittut atuuttoq. Aalajangersagaq oqaasertalersorneqarpoq Nuuk

Nunatta Atuagaateqarfeqareermat Nuup Kommuniani innuttaasunut atuagaateqarfeqarnissaanik piomasqaateqarnissaq piomasarissallugu tunngavissaqannginnera aallaavigalugu. Nuup Kommunian atorunnaarnikuvoq, aammalu Kommuneqarfik Sermersuumut tunngatillugu immikkut inissisimasoqarnissaanik tunngavissaqavinngimmat aalajangersagaq imatut oqaasertalersorneqarpoq Nunatta Atuagaateqarfia Kommuneqarfik Sermersuumi pingaarnertut atuagaateqarfiusoq. Tamassuma kingorna kommunalbestyrelsi kommunip sullissivigisaani sumiiffinni sullissinissaq aalajangersinnaavaa, tassunga ilanngullugu kommune immikkoortortanik sumi pilersitsisoqassanersoq. Tamanna aamma Kommuneqarfik Sermersuup nunaqarfiinut atuuppoq.

Tamanna isumaqavippoq Nunatta Atuagaateqarfia Nuup Kommuniani innuttaasunut atuagaateqarfiunermiit maannakkut Kommuneqarfik Sermersuumi taamaallaat pingaarnertut atuagaateqarfiulersoq.

Imm. 3-mut

Aalajangersakkami maannakkut inatsisaasumut tunngatillugu nutaajusumi pingaarnertut atuagaateqarfimmi aqutsisumut piginnaasanik piomasqaatit allaqqapput, tamannalu atuagaateqarfernermut tunngatillugu pitsaassutsip qulakkeerneqarnissaanik kissaateqarnermut atatillugu isigineqassaaq. Aalajangersakkami sulianik allanik ilinniarsimasut allat bibliotekariunngitsut innuttaasunut atuagaateqarfinni aqutsisutut sulisinnaanerit periarfissineqarput, assersuutigalugulu universitetimi ilinniagaq naleqquttoq suliamik ingerlatsinermi naleqquttut ilinniagaqarnertut isigineqarsinnaavoq. Pingaarnertut atuagaateqarfimmi aqutsisumik atorfinitsitsinermi qinnuteqartup suliamik ingerlatsinermi aqutsinermilu piginnaasaanik ataatsimut nalilersuinikkut aamma pisinnaavoq.

§ 5-imut

Aalajangersagaq Inatsisartut peqqussutaanni § 5-imik ingerlatitseqqiineruvoq.

Imm. 1-imut

Aalajangersakkami allaqqavoq pingaarnertut atuagaateqarfinnut piomasqaataasoq inersimasunut meeqqanullu immikkoortortaqaarnissaat. Aalajangersagaq minnerpaaffissamik piomasqaataavoq, tassa kommunalbestyrelsit aalajangersinnaammata atuagaateqarfinnut immikkoortortaqaarfiit inersimasunut meeqqanullu immikkoortortaqaassanersut.

Aalajangersagaq isumaqarpoq kommunalbestyrelsit aalajangersinnaasut inersimasunut meeqqanullu atuagaateqarfinnut immikkoortortaqaarfinni naleqqussorisani pilersitsisinnaasut. Pisariaqartitsineq piviusut tunngavigalugit aalajangiunneqassaaq, periarfissiissallunilu neqeroorutinik pilersitsinissamut sullinniakkat assigiinngitsut atorfissaqartitaat tunngavigalugit.

Piomasagaatigineqarsinnaannginneranut pissutaavoq immikkoortortaqarfiit tamarmik immikkut meeqqanut inersimasunullu immikkoortortaqarfilersornissaannut inissamik aningaasaqarnermullu apeqqut. Pingaarnertut atuagaateqarfiit immikkoortortaqarfinnut ilisimasamik isumalluutinillu siammarterivittut ingerlapput, siunnersuisinnaallutik aammalu atortunik atortitsisinnaallutik nammineq katersat saniatigut tapertarillugit.

Imm. 2-mut

Aalajangersakkami allaqqavoq immikkoortortat suusinnaanersut. Eqqarsaatigineqarsinnaavoq immikkoortortat utoqqaat angerlarsimaffiini, napparsimmavinni, meeqqat angerlarsimaffiini paaqqinnittarfinnilu allani inissinneqarsinnaasut.

§ 6-imut

Aalajangersagaq Inatsisartut peqqussutaanni atuuttumi § 6-imik ingerlatitseqqiineruvoq, aammalu innuttaasunut meeqqallu atuarfianni atuagaateqarfiit suleqatigiinnissaat pineqarluni. Aalajangersagaq pisinnaatitsinermik aalajangersakkatut oqaasertalerneqarpoq, tassani ersimmat suleqatigiinneq nalunaarummi aalajangersakkat naapertorlugit pissasoq.

Aalajangersakkami ataatsimut atuinissaq siunertaavoq, taamaalillunilu meeqqanut meeqqallu atuarfiini atuagaateqarfiit atukkiussassanik atuakkanillu najoqqutassanik katersugaataannik pisiortortarneq ataqatigiissinneqassalluni. Katersugaatinik ataatsimut atuinermi tassani pineqarpoq innuttaasunut atuagaateqarfiit meeqqanut atuarfimi pilersinneqarnissaat. Aalajangersakkami innuttaasunut atuagaateqarfiit meeqqanut immikkoortortallit atuarfiit avataanni inini allani pilersinneqarnissaannut akornutaanngilaq, tamanna naleqquttutut nalilerneqarpat immikkut illumi atuagaateqarfimmi.

Innuttaasunut atuagaateqarfiit meeqqallu atuarfiini atuagaateqarfiit atuagaateqarfiit meeqqanik sullissineranni suleqatigiinnissamut pisussaaffeqarnerat takussutissaanngilaq innuttaasunut atuagaateqarfiit aamma meeqqat atuarfiini atuagaateqarfiit ilinniartinnit atuagaateqarfinnik suleqateqarniarsarissanngitsut, tamannami pisareerpoq.

§ 7-imut

Aalajangersagaq Nunatta Atuagaateqarfia pillugu Inatsisartut inatsisaanni atuuttumi § 8-mik ilaatigut ingerlatitseqqiineruvoq, takussutissaallunilu Nunatta Atuagaateqarfia Namminersorlutik Oqartussat ilagigaat, taamaalillunilu suliamik ingerlatsinermi oqartussaasut ilitersuisinnaatitaanerisa ataaniilluni, tamassumalu saniatigut aalajangersakkanut Namminersorlutik Oqartussat sulisoqarfiinut allanut atuuttunut ilaalluni.

§ 8-mut

Aalajangersagaq nutaajuvoq Nunatta Atuagaateqarfianilu sulisut pineqarlutik.

Imm. 1-imut

Aalajangersagaq nutaajuvoq pineqarlunilu Nunatta Atuagaateqarfiani aqutsisoq. Nunatta Atuagaateqarfiata kissaateqarneratigut siunnersuutigineqarpoq aqutsisup taaguutaa ”nuna tamakkerlugu bibliotekari”-miit ”atuagaateqarfimmi pisortaq”-mut allangortinneqassasoq. Tassunga ilaatigut pissutaavoq atorfik inummit atuagaatilerisumut ilinniarsimasumit inuttalerneqartariaqanngitsaq, tassa Nunatta Atuagaateqarfiani aqutsisutut atorfimmut ilinniarsimanagerit naleqquttut allat atorfinissutaasinnaammata, tak. ataatungaani imm. 1, oqaasertat aappaanni. Allanguut akissarsiatigut atorfeqarnermilu atugassaritinneqartunut pingaaruteqanngilaq.

Aalajangersakkami oqaasertat siulliat isumaqarpoq atuagaateqarfimmi pisortaq ingerlatsinermi oqartussaasut ilitersuisinnaatitaanerannut maannakutut ilaasoq, tamannalu isumaqarpoq ingerlatsinermi oqartussaasut atuagaateqarfimmi pisortamut tunngatillugu sulisitsisutut tamanik pisinnaatitaaffeqartut. Tamanna aammattaaq isumaqarpoq atuagaateqarfimmi pisortaq aningaasaqarnikkut, allaffissornikkut atuagaateqarfimmilu suliamik ingerlatsinermi aqutsinermik ingerlatsinermini ingerlatsinermi oqartussanut akisussaaffeqartoq. Tamassuma tassunga peqatigitillugu takutippaa Naalakkersuisut Nunatta Atuagaateqarfiata ingerlatsineranut qulliunerusumik akisussaasuusut.

Aalajangersakkami oqaasertat aappaanni Nunatta Atuagaateqarfiata suliassanik ingerlatsinerani tunngatillugu pitsaassuseq qulakkeerniarlugu piginnaasanut piumasaqaatit ilaat, tassanilu ilaatigut pineqarpoq atuagaateqarfeqarnermut tunngasunik suliamik ingerlatsinermi atuagaateqarfinnut allanut naammaginarumik ikiuuttarnissaq. Universitetimi ilinniarsimaneq naleqquttoq assersuutigalugu suliamik ingerlatsinermi naleqquttumik tunuliaquteqarnertut isigineqarsinnaavoq.

Imm. 2-mut

Aalajangersagaq takussutissaavoq Nunatta Atuagaateqarfiani atuagaateqarfimmi pisortaq atorfinitsisinissamut pisinnaatitaaffeqartoq. Tassunga pissutaavoq sulisunik naleqquttunik toqqaasernerup atorfinitsitsisarnerullu Nunatta Atuagaateqarfiani pisortap suliassaatut pingaarutilittut isigineqarnera.

Aalajangersakkap oqaasertaatali allangortinngilaa atuagaateqarfimmi pisortaq aammalu taamaalillunilu Nunatta Atuagaateqarfia sulisoqarfiusoq ingerlatsinermi pisortat oqartussaasut ataanniittoq.

§ 9-mut

Aalajangersagaq Inatsisartut peqqussutaanni atuuttumi § 9-mik annertunertigut ingerlatitseqqiineruvoq, pineqarlunilu Nunatta Atuagaateqarfiata kommuninilu atuagaateqarfiit suleqatigiinnerat.

Imm. 1-imut

Aalajangersakkami pineqarpoq Nunatta Atuagaateqarfia kommunini atuagaateqarfinnut tapersiisarnissaa. Aalajangersakkami pisariaqarpoq Nunatta Atuagaateqarfia atuakkanik atukkiussassanillu allanik kommunini atuagaateqarfiit namminneq pineqanngikkaangata imaluunniit pissarsinissamik eqqarsaateqaraangata atukkiisassasoq pissarsisassasorluunniit. Nunatta Atuagaateqarfiata atukkiisarnera ataasiakkaanik toqqorsivimmilluunniit atukkiisassasoq naatsorsuutigineqarpoq.

Atuagaateqarfeqarnermi tunngasutigut ikiunneq assersuutigalugu imatut paasineqassaaq, ininik ilusilersuineri, atuakkanik pisiortornermi ungalulersuinermilu suliaqarnermik ilitsersuineq.

Imm. 2-mut

Aalajangersakkami pineqarpoq innuttaasunut atuagaateqarfinnut tamanut tapersiisarneq, tassani kommunini atuagaateqarfiit kisimik pineqanngillat aammali innuttaasunut atuagaateqarfiit, assersuutigalugu suliamik ingerlatsinermut atuagaateqarfiit ilinniarfeqarfiit ataaniittut.

Atuagaateqarfeqarnermi tunngasutigut suliamik ingerlatsinerup ikiunnermut pingaartumik ilaapput atuakkanik toqqaanermi ilitsersuineq, atuagaateqarfiit atuagaataannik atorunnaakkanik nutarterinermilu ikiunneq kiisalu katalogit qitiusumit suliarineqartut atorlugit atuagaateqarfiit atuagaatissaannik pilersitsineq peqaannarnerlu pillugit siunnersuisarneq. Tamassuma saniatigut atuagaateqarfeqarnermi tunngasutigut suliamik ingerlatsinermut ikiunnermi innuttaasunut atuagaateqarfinni bibliotekarinit atuagaateqarfeqarnermi tunngasutigut suliamik ingerlatsineq pillugu tamanut tunngasumik ilitsersuisarneq siunertaavoq, tassanilu aamma pikkorissartitsisarnerit ilaasinnaapput.

Innuttaasunut atuagaateqarfinnut allanut atuagaateqarfeqarnermi tunngasutigut suliamik ingerlatsineq pillugu siunnersortitut ikiunnermi aamma pineqarpoq ilaatigut atuagaateqarfiit allat atuagaateqarfeqarnermi tamanut tunngasumik ingerlatsinerannik ataqatigiissarineq.

Imm. 3-mut

Pisinnaatitsineq pillugu aalajangersagaq pineqarpoq, taannalu Inatsisartut peqqussutaanni atuuttumi § 9, imm. 2-mik ingerlatitseqqiineruvoq. Aalajangersakkami assersuutigalugu atuagaateqarfeqarnermi tunngasutigut suliamik ingerlatsineri ikiuuttarnermik

Naalackersuisut nalunaarutikkut killilersuisinnaanerit ammaanneqarpoq. Pisinnaatitaaffik manna tikillugu atorneqarnikuunngilaq.

§ 10-mut

Aalajangersagaq Inatsisartut peqqussutaanni § 10-mik ilaatigut ingerlatitseqqineruvoq, maannakkullu pisinnaatitsineq pillugu aalajangersakkamik ilaneqarluni.

Imm. 1-imut

Aalajangersagaq kommunini atuagaateqarfinnut sullissinertut isigineqassaaq. Aalajangersagaq kommunini atuagaateqarfiit ataasiakkaat kalaallisut atuakkanik Kalaallit Nunaanni avataanilu saqqummersinneqartunik atuagaateqarfiit ataasiakkaat atorfissaqartitaminnik pisiortornissaasa naleqqutinnginnera taamaalillunilu naleqqutinngitsumik aningaasartuutaanissaa tunngavigalugu isigineqassaaq.

Tassunga tunngatillugu naatsorsuutigineqarpoq pisiortornermi agguaanermilu aningaasartuutit Nunatta Atuagaateqarfianit akilerneqassasut.

Aalajangersakkap kinguneraa Kalaallit Nunaanni avataanilu saqqummersitanik kalaallisuunik imatut amerlatigisunik pisisassasoq atuagaateqarfiit tamarmik saqqummersitanik naammattumik amerlassusilinnik pilersorneqarsinnaallutik. Nunatta Atuagaateqarfia aamma kalaallit atuagaataannik imatut uninngasuuteqassaaq saqqummersitat atuakkerivinni nungunnerisa kingorna atuagaateqarfiit piffissami naammattumi nutaanik pilersorneqarsinnaallutik.

Aaqqissuussineq atuakkianik kalaallisuunik tamanik allattuivimmik aamma tunngaveqarpoq. Periutsimi agguaanermi tunngavimmik imaqarpoq, taamaalilluni Kalaallit Nunaanni tamarmi atuagaateqarfinilu ataasiakkaani atuakkianik kalaallisuunik sunik peqartoqarnersoq Nunatta Atuagaateqarfia takunnissinnaalluni. Atuakkat agguanneqassapput agguaanermilu tunngavittut aalajangersakkani sinaakkutit iluanni pissarsiareqqinneqarsinnaallutik.

Atuagaateqarfiit ataasiakkaat namminneq pisiortornissaannut tunngatillugu annertussutsit tunngavigalugit nalinginnaasumik akikilliliissuteqartoqarsinnaanermik periuseq aamma kinguneqarpoq.

Imm. 2-mut

Aalajangersagaq nutaajuvoq pisinnaatitsinermillu imaqarluni, taamaalillunilu pisiortornerit agguaanerillu imm. 1-imi taaneqartut annertussusaat suunerallu Naalackersuisut nalunaarutikkut killilersorsinnaallugit.

§ 11-mut

Aalajangersagaq imarisamigut Inatsisartut peqqussutaanni § 11, imm. 1-imik ingerlatitseqqiineruvoq, pineqarluni Groenlandica Kalaallit Nunaanni nuna tamakkerlugu ilisimatusarnermilu atuagaateqarfik. Groenlandica aaqqissuussaanermi Nunatta Atuagaateqarfiata ataani immikkoortortaqarfiuvoq. Ilimmarfiup pilersinneqarneranut atatillugu Groenlandica Ilimmarfimmuut inissinneqarpoq. Tamanna pivoq ilaatigut init pitsaasuunissaat eqqarsaatigalugu aammalu universitetip atuagaateqarfianik suleqateqarnermi pisut imminnut pitsaasumik sunneeqatigiittarnissaat eqqarsaatigalugu.

Imm. 1-imut

Aalajangersagaq aalajangersakkamut atuuttumut tunngatillugu pilersitat nalunaarsorneqarnissaannik katersorneqarnissaannillu siunertaqarnermik ilaneqarpoq.

Aalajangersakkap kinguneraa Groenlandica kalaallit kulturimi kingornutaasa qulakkeerneqarnissaannut tapersiinissaq siunertaralugu pilersitanik Kalaallit Nunaanni tamanut saqqummiunneqartunik tamanik sulianik ingerlatsiviit, qanoq ittuunerat, oqaatsit pitsaassutsilluunniit apeqqutaatinnagit katersuisoqassasoq, nalunaarsuisoqassasoq attatsitsiinnartoqarlunilu. Tassunga atatillugu ilanngunneqassaaq suliassaq pinngitsoorani tunniussisussaatitaanermik § 21-imi taaneqartumik taparserneqartoq.

Imm. 2-mut

Aalajangersakkami katersukkat suunissaasa annikinnerpaaffissaat allaqqavoq. Katersukkat taamaammat pilersitat Nunatsinni kulturimi kingornutanut pingaaruteqartut Nunatta Atuagaateqarfia naliliippat pilersinneqartunik Kalaallit Nunaanni saqqummiunneqartunik allanik ilaneqarsinnaapput.

§ 12-imut

Aalajangersagaq Inatsisartut peqqussutaanni § 11, imm. 2-mik ingerlatitseqqiineruvoq. Aalajangersakkami pineqarpoq ilisimatusarnermi atuagaateqarfimmik pilersitsineq. Aalajangersakkap pingaaruteqassusia pissutigalugu aalajangersakkap immikkut paragrafiutillugu immikkoortinnissaa naleqquttutut isigineqarpoq. Aalajangersakkami Groenlandicami katersukkat imminnut atanerat takutinniarnaqarpoq, tassungalu peqatigitillugu akisussaaneq Nunatta Atuagaateqarfiani erseqqissumik suli inissinneqarluni. Naatsorsuutigineqarpoq atuagaateqarfiup inuit ataasiakkaat sulisoqarfiillu sullissinnaassagai.

§ 13-imut

Aalajangersagaq nutaajuvoq, aalajangersarneqarlunilu pissarsiarineqarsinnaasunnngortitsinissamik pisussaaffiup saniatigut ingerlatitseqqiisarnissamik pisussaaffeqartoqartoq. Suliassat Nunatta Atuagaateqarfiata sulareriigai pineqarput.

Iisimasaniq misigisanillu ingerlatitseqqiisarnit saqqummersitsinerit, aqqissuussinerit, oqalugiarnit, kulturikkut paarlaasseqatigiinnerit, saqqummersitat assigisaallu atorlugit pisassapput.

§ 14-imut

Aalajangersagaq Inatsisartut peqqussutaanni atuuttumi § 12a-mik tunngaveqarpoq, taannalu Bibliotekeqarneq pillugu Inatsisartut peqqussutaata allanngortinneqarneranik Inatsisartut peqqussutaat nr. 13, 30. oktober 1992-imeersumi ilanngunneqarpoq.

Aalajangersakkami kikkut atuagaateqarfimmiittuutisianik pisinnaatitaanersut pillugit nassuiaat tamatigoornerulerpoq siunissamilu atorneqarsinnaanerulerluni, kikkullu pineqarnersut assersuusiorneqarlutik. Aalajangersakkamut atuuttumut inuit kikkut pineqarnerannik tamakkiisumik allaaserinninnermik imaqartumut akerliutillugu isigineqassaaq. Peqatigitillugu atuagaateqarfimmiittuutisiat pillugit malittarisassiorsinnaanermik pisinnaatitsineq erseqqissarneqarpoq, tassunga ilanngullugu inuit pineqartut killilerneqarnerat aammalu taakkununga atuagaateqarfimmiittuutisiat agguarneqartarnerat.

Aaqqissuussineq kalaallisut atuakkanut tapersiisarnissamik kissaateqartumut tamakkiisumik tunngassuteqarpoq aammalu innuttaasut atuakkiatik pisiarinagit atorsinnaanernik atuakkiortut il.il. naammaginnittariaqarneranni isertitassanik annaasaqarnerannut taarsiissutitut isigineqarsinnaalluni.

Aalajangersagaq aamma eqqumiitsuliortut, kulturimi pilersitsisut, tigussaangitsunillu piginnittut peqatigiiffii, assersuutigalugu Koda aqqutigalugu, pisinnaatitaaffiit atuagaateqarfimmiittuutisiat ilassutitut isigineqassaaq.

Imm. 1-imut

Aalajangersakkami ersippoq inunnut akilerneqartussanut agguarneqartussanik aningaasanik ukiumoortumik aalajangiisartuusut tassaasut Inatsisartut. Aningaasanik agguaneq malittarisassat pisinnaatitaanermut aalajangersakkat imm. 2-mi ingerlateqqinneqartut naapertorlugit pisarpoq.

Imm. 2-mut

Aalajangersagaq oqaasertaanik allannguilluni Inatsisartut peqqussutaanni atuuttumi § 12, imm. 2-mik ingerlatitseqqiineruvoq.

Aalajangersagaq atuagaateqarfimmiittuutisianut qinnuteqartarneq pillugu malittarisassiornissamut atorneqarsinnaavoq, tassunga ilanngullugit piffissarititaasut imaluunniit ukiumoortumik qinnuteqarani ingerlaannaq agguasarnermik aaqqissuussinermik pilersitsinermut. Imm. 1-imi taamaallaat inuit atuagaateqarfimmiittuutisianik pisinnaasut inatsisikkut assersuusiorneqarmata imm. 2-mi tamanna pillugu annertunerusumik killiliinissamik aalajangiisinnaaneq periarfissinneqarpoq. Atuagaateqarfimmiittuutisiat agguarneqarnissaat pillugu aammattaaq malittarisassiortoqarsinnaavoq, atuagaateqarfimmiittuutisianut piginnaatinneqarnissamut piumasagaatit allat, atuagaateqarfimmiittuutisiat annertussusaat, tassunga ilanngullugit pilersitat suut pineqarnersut tunngavigalugu atuagaateqarfimmiittuutisianik annertussusiliineq. Atuagaateqarfimmiittuutisianik pisinnaatitaasoq toqusimappat qanigisaasunut malittarisassiorsinnaaneq aammattaaq eqqarsaatigineqarsinnaavoq.

Aalajangersakkami taamaalilluni nalunaarusiornikkut periarfissinneqarpoq tusagassiuutitut nutaanerusunut tapersiisut atuagaateqarfimmiittuutisianit akissarsisitsisoqarsinnaasoq, tassunga ilanngullugit atuakkani immiunneqartuni atuartut.

Pisinnaatitaaneq atuuttoq Atuagaateqarfimmiittuuteqarnermut akissarsiassat pillugit Namminersornerullutik Oqartussat nalunaarutaat nr. 15, 5. oktober 1999-imeersukkut atorneqarpoq.

§ 15-imut

Aalajangersagaq Inatsisartut peqqussutaanni atuuttumi §12-imik ingerlatitseqqiineruvoq, akiliisitsinani atukkiussisarneq pillugu periutsimik immikkut ilanngunneqangitsutut inissisimalluni.

Imm. 1-imut

Aalajangersakkami atuagaateqarfiit immikkut sullissineranni akiliisitsisinnaanerit inatsisikkut aalajangersarneqarpoq.

Immikkut sullissinerit tassaapput sullissinerit inniminnikkat, atuagaateqarfiit paasissutissiisarnissaanik siunertamut attuumassuteqarsinnaasut, kisiannili sumiiffimmi atorneqartartunit, atortunik atukkiussinermit nalinginnaasumillu ilitersuinermit annertunerusut. Immikkut sullissinerit taakku taamaalillutik nalinginnaasumik atorneqartuniit isumalluutit eqqarsaatigalugit annertunerugajupput. Sullississutit assersuutigalugu tassaasinnaapput tuaviortumik sullissinerit, tassani immikkut iliuuseqarnikkut nunanilluunniit allanit inniminniinikkut atortut piaarnerpaamik pissarsiarineqarnissaannik atuisoq kissaateqarluni, tassani atortut nunanit allanit pissarsiarineqarlutik tassungalugu atatillugu immikkut aningaasartuuteqartoqarluni. Sullissinerit assersuutigalugu atortunik digitaliusunik

assersuutigalugu qarasaasiami allannissamut programmini qarasaasiami programminik atortitsinerni aamma akiliisitsisoqarsinnaavoq. Paasissutissii-vinnik elektroniskiusunik atuisinnaaneq tusagassiorfinnut naqitanut atuuttunit allaannersunik piginnittuunermik aalajangersakkaniipput atuisinnaanermillu isumaqatigiissuteqarnikkut pilersinneqarajuttarlutik.

Aalajangersakkami aammattaaq atortunut naqitanut assilisanulluunniit atuisumit inniminnerneqartunut atuisullu pigiligaanut akiliisitsisarneq atuuppoq.

Piumasaqaataavoq immikkut sullissinerit atuagaateqarfiit sullissinerat nalinginnaasoq assersuutigalugu atuagaateqarfiit atuisunik nalinginnaasumik sullissinerisa annikillinneratigut kalluassanngikkaat.

Imm. 2-mut

Aalajangersagaq isumaqarpoq atuisoq sullissisoqarnissaanik ersarissumik kissaateqanngippat imm. 1 malillugu sullissinernut atuagaateqarfiit akiliisitsisinnaanngitsut. Taamaammat naleqqutissaaq inniminniisoqarneranik atuagaateqarfiit uppersaasiornissamik qulakkeerinnissasut atuisorlu ilisimatinneqassasoq inniminniineq qanoq akeqarsimanersoq

Imm. 3-mut

Aalajangersagaq isumaqarpoq sullississutinut imm. 1-imi taaneqartunut akiliutit annertussusissaannik Naalakkersuisut kommunalbestyrelsillu aalajangiisartut. Tassani naatsorsuutigineqarpoq immikkut sullissinerni assigiinngiaartuni akit annertussusaat imaluunniit akinik assigiinngiaartunik qaffasissusiliinernik ilisimatitsilluni akiliisitsisarnermik aqqissuussineq atorneqassasoq. Tassunga tunngatillugu piumasaqaataavoq pilersitsinermut sullissinermulluunniit aningaasartuutit annertunerpaamik matussusissagaat kiisalu akit ilisimatitsissutigineqartut aammalu akit assigiinngiaartut qaffasinnerpaaffiat qaanginngisaannassagaat.

§ 16-imut

Aalajangersagaq Inatsisartut peqqussutaanni § 12c-mik atuinervoq, pineqarlunilu atuakkanik il.il. atornermi kingusinaarluni utertitsisoqarnerani akiliisitsisinnaaneq. Akiliutini salliutillugu siunertaavoq atorniartut utertitsinissamut piffissarititat malissagaat, taamaalilluni akiliutit atuakkat il.il. piffissaq eqqorlugu utertinnissaannut kajumissaataassapput. Atuakkanik il.il. kingusinaarluni utertitsisoqarnerani akiliisitsisoqanngippat atuakkat il.il. atuisunut allanut angerlaallugit atornissaannik kissaateqartunut ajoqutaasumik kingusinnerusukkat atortinneqarsinnaanerat atuisut pisinnaajunnaartissavaat.

Atuagaateqarfiit atuakkanik il.il. atortitsinissamik suliassaminnik suliarinninnissaanut piumasaqaataavoq atorneqartut piffissaq eqqorlugu utertinneqarnissaat, taamaalilluni atuisut

allat, tassunga ilanngullugit inniminniisimasut, atorniarnissamut periarfissat aamma atorluarsinnaassallugit. Akiliutit taamaalilluni atuagaateqarfiit qaammarsaanissap, ilinniartitsinerup kulturikkullu ingerlatsinerup siuarsarnissaat siunertaralugu atuakkanik atortunillu allanik akiliisitsinatik atugassiisarnissaannik siunertamik eqqortitsinissaannut tunngaviuvoq.

Akiliisitsisarnermi tassunga peqatigitillugu siunertaavoq utertitseqqusinermit piffissanillu utertitsiviusussanik aqutsinernut atuagaateqarfiit aningaasartuutaannut matussutaasassasut.

Imm. 1-imut

Atortunik angerlaallugit atukkanik kingusinaarluni utertitsisoqarnerani akiliisitsinissamut atuagaateqarfiit aalajangersakkami pisinnaatinneqarput. Akiliutit annertussusivissaannik aalajangiineq eqqarsaatigalugu atuagaateqarfiit maannakkut akigititaat annertuumik isiginiarneqarput, tassungali peqatigitillugu siunnersuutigineqarpoq akiliisitsisarnerup siunissamut qulakkeerneqarnissaa siunertaralugu annertussusiliisoqassasoq. Aningaasat annertussusaat taamaalilluni atuagaateqarfiit maannakkut akiliisitsisarnerisa annertussusaannit annertunerusunnagortinneqarput. Aalajangersakkami aamma ersippoq akiliutit annertussusaat eqqarsaatigalugit atorniartartut inersimasut atorniartartullu meeqqat inuusuttullu 15-it ataallugit ukiullit akornanni assigiinngiiaartitsisoqassasoq. Immikkoortitsinermut pissutaavoq meeqqat inuusuttullu annikinnerusumik akiliisinnaassusaasa isiginiarneqarnissaa.

Akiliutit annertussusaat pineqartut tassaapput eqqaasitsinermut akiliutit, taamaalilluni atukkanik utertitsisussaataaneq akiliutit pineqartut akileqquneqareerneranni akilerneqareernerannilu atuutiinnassalluni.

Akiliutit aamma annertusitittarlugit katersorneqarsinnaanngillat, taamaalilluni inersimasup ullunik qulinik kingusinaarluni utertitsinerani taamaallaat 50 kr.-mik akiliisitsisoqartassaaq. Pisumi tassani soorunami marloriarluni siullermik 15 kr.-imik kingusinnerusukkullu 50 kr.-mik ilallugit akiliisitsisoqarsinnaanngilaq.

Atortut atukkat tamakkerlugit ataasiinnarmik akiliisitsisoqartassaaq, atortullu ataasiakkaarlugit akilersinneqartassanatik.

Akiliutit atortut atortinneqartut kingusinnerusukkut utertinneqarnerat apeqqutaatinnagu atortullu tamarneqarsimasutut aserorneqarsimasutullu isigineqarnerat apeqqutaatinnagu suli akileqquneqarsinnaapput, atuagaateqarfiillu taamaammat § 17, imm. 1 malillugu atortut taarseqqusinnaavaat.

Oqaatigineqassaaq aalajangersagaq avaqqunneqarsinnaammat, taamaalilluni Naalakkersuisut kommunalbestyrelsillu aalajangiisinnaapput akileeqqusisitsisoqartassanersoq, taamaattoqarpallu annertunerpaaffiit iluanni akiliutit taakku qanoq qaffasissuseqassanersut

atuagaateqarfiillu uterteqqusisarnermik aqutsinerannut atatillugu aningaasartuutiviit killingisa iluaniissallutik.

Imm. 2-mut

Atorniartartutut uppernarsaatnik taarsiinermi atuagaateqarfiit akiliisitsisinnaanerat aalajangersakkami qulakkeerneqarpoq. Aalajangersakkami siunertaavoq atorniartartutut uppernarsaammik taarsiinermut atatillugu aningaasartuutiviit amerlaqataannik akiliisitsisoqarsinnaasoq. Siunissamut qulakkeerininnissaq pillugu ajornartorsiutit imm. 1-imi taaneqartut eqqarsaatigalugit akiliutit annertunerpaaffissaat atorniartartutut uppernarsaatit taarserneranni atuagaateqarfiit akigititaasa annertussusaannit qaffasinnerusumut inissinneqarput.

§ 17-imut

Aalajangersagaq Inatsisartut peqqussutaanni § 12d-mik annertunerusutigut ingerlatitseqqiineruvoq, pineqarlunilu atorsinnaanermik annertuumik unioqqutitsinerup, akiitsunik akiliinnginnerup imaluunniit malittarisassanik atuagaateqarfinni atuuttunik annertuumik unioqqutitsinerup kinguneranik atuagaateqarfimmik atorniartartutut atuisinnaajunnaartitsineq.

Imm. 1-imut

Aalajangersakkami nr. 1-imi malittarisassanik atuuttunik ingerlatitseqqiineruvoq, pineqarlunilu atortut atukkat ajortinnagit utertinneqartussaataitanerannik annertuumik unioqqutitsisoqarnerani atuagaateqarfimmit atuisinnaajunnaarsitsisinnaanermik ersarissumik pisinnaatitsineq. Aalajangersagaq taamaalilluni atorniartup atortut angerlaallugit atukkani utertinngippagit imaluunniit atortut utertinneqartut ajortissimappata atorniartartullu atortunik atukkanik taarsiinissamik piumasagaat malinngippagu atorneqarsinnaavoq. Atuisinnaajunnaarsitsineq aamma pisinnaavoq atorniartarnek arlaleriarluni unioqqutinneqarpat, taamaalilluni taamatut pisoqarnerani angerlaallugit atorsinnaaneq eqqarsaatigalugu piffissami aalajangersimasumi atuisinnaajunnaarsitsisoqarsinnaavoq.

Aalajangersagaq taamaallaat atortut atukkat pillugit pisussaaffinnut tunngavoq, taamaalillunilu malittarisassanik allanik unioqqutitsinerup kinguneranik atuagaateqarfimmik atuisinnaajunnaarsitsisinnaaneq isummerfigineqarani, tassunga ilanngullugu malittarisassaasinnaasunik unioqqutitsineq, tassunga taarsiullugu takuuk imm. 4. Aalajangersagaq taamaalilluni atuagaateqarfiup atortunik atuisinnaajunnaarsitsisinnaanermik piginnaatitsissummik imaqaanngilaq. Atuisinnaajunnaarsitsinerit taamaattut pissutsit

tunggavigalugit atuagaateqarfiit namminneq malittarisassaanni killilersorneqartariaqarput, tak. imm. 3, aamma § 20, imm. 2.

Aalajangersakkami aamma atuakkanik il.il. tammartunik aserorneqartunilluunniit taarsiissutit annertussusaat pillugu apeqquq killilersorneqanngilaq, tassa taakku annaasat aallaavigalugit taarsiisarneq pillugu malittarisassani nalinginnaasuni killilersorneqarmata, taamaalilluni taarsiissutit piseqqinnermut assersuutigaluguluunniit atuakkanik iluarsaassinnermut ungaluleeqqinnermulluunniit aningaasartuutit nalinginnaasumik annertoqatigisarpaat.

Aalajangersakkami nr. 2-mi akiliutinik taarsiissutinilluunniit akiliinnginnerup kinguneranik akiitsoqarnerup kinguneranik atuisut atuisinnaajunnaarsinnissaannut pisinnaatitsisoqarpoq. Atuisut atuisinnaajunnaarsinneqarsinnaanerata taamaallaat atuakkanik atortunillu allanik atortitsinnermi akiitsunut kiisalu atorniartartutut uppersaammik tunniussinnermut atatillugu atornerqarsinnaavoq, taamaalillunilu assersuutigalugu assilisanik nuutsitanik akiliinnginnermi atornerqarsinnaanani.

Imm. 2-mut

Atuisup imm. 1 malillugu akiligassani akilerpagit atuisinnaajunnaartitsinerup taamaatinneqarnissaa aalajangersakkami qulakkeerneqarpoq. Tassunga atatillugu oqaatigineqassaaq atortunik ajortinnikunik atuisup utertitsinera naammangitsoq, aatsaalli atorniartoqaqqilersinnaavoq atortut ajortinnikut taarserlugit kiisalu § 16, imm. 6 malillugu eqqaasitsinnermut akiligassanik akiliisoqarpat. Atuisup aatsaat akiitsut tamaasa akilerpagit atuisinnaajunnaarsitsineq atorunnaassaaq, atuisumut atuisinnaajunnaartitsinerup atorunnaarneranik isumaqatigiissuteqartoqanngippat. Siunnersuutigineqarpoq akiligassaarunnissaaq utertitsinissarluni siunertaralugit malittarisassaaq pingarneq ilanngunneqassasoq. Taamaalilluni akilersuinissamik isumaqatigiissutaasinnaasoq naapertorlugu tamanna pinngippat atorniartartup akiitsumi ilaanik akiliinera naammangilaq.

Imm. 3-mut

Atuisut annertuumik arlaleriarlutilluunniit malittarisassanik unioqqutitsisut atuagaateqarfimmik atuisinnaajunnaarnissaat qulakkeerniarlugu inatsimmi ersarissumik pisinnaatitsineq aalajangersakkami pilersinneqarpoq. Assersuutigalugu tassaasinnaapput atuagaateqarfimmi arlaleriarluni nipiliorneq mianerinnannanilu iliuuseqarneq, imigassartorneq malittarisassanillu unioqqutitsinerit annertuut taakkulu assigisaat.

Aalajangersagaq sivilunerpaamik qaammatini pingasuni atuisinnaajunnaartitsisinnaanermik imaqarpoq, kisiannili piffissap naareernerani unioqqutitsinerit ingerlaqqippata atooqqinneqarsinnaalluni.

Pisuni ajortuni immikkorluinnaq ittuni, assersuutigalugu nakuusertoqarnerani, annertuumik aserorterisoqarnerani assersuutigaluguluunniit sulisunut sakkortuumik siorasaarinermi ajortuliortup qaammatinit pingasunit sivilunerusumik atuagaateqarfimmut iseqqusaajunnaarsinnaavoq, assersuutigalugu sulisut suliffimmi toqqissisimanissaat eqqarsaatigalugu. Taamatut iseqqusiunnaarneq, illumik piginnittup pisinnaatitaaffeqarneranik pisinnaatitsinermik tunngaveqartoq, atuisinnaajunnaarnermut paarlaanneqassanngilaq. Ajortuliortoq tamassuma kinguneranik, immaqa qaammatini pingasuni atuisinnaajunnaartitsinerup kingorna, atuagaateqarfiup sullissineranik killilimmik atuisinnaavoq, assersuutigalugu atuagaateqarfik taamatut sullissinissamik periarfissaqarpat internetikkut atuakkanik angerlaallugit atugassanik inniminniinikkut.

§ 18-imut

Aalajangersagaq Inatsisartut peqqussutaanni § 12e-mik ingerlatitseqqiineruvoq, pineqarlunilu atortut immikkut issusiisa kinguneranik atorsinnaanerup killilerneqarnera.

Imm. 1-imut

Assersuutigalugu atortut akisuut qaqutigootut aseroriaannaalluunniit pineqarpata atortunik angerlaallugit atorsinnaanerup killilerneqarnissaanik atuagaateqarfiit killiliisinnaaner atalajangersakkami periarfissinneqarpoq.

Imm. 2-mut

Assersuutigalugu atortunik akisuunik qaqutigootunilluunniit atortitsinermut atatillugu qularnaveeqqummi akiliisitsisoqarnissaanik atuagaateqarfiit pisinnaatinneqarput. Aalajangersakkamut tunngavilersuutaavoq atortitsineranut atatillugu atuagaateqarfiit annaasaqarnissaasa pinngitsoortinnissaa eqqarsaatigalugu. Tassunga atatillugu naatsorsuutigineqarpoq qularnaveeqqutit pineqartup annertussusaa atortut angerlaallugit atornissaannik kissaatigisat naliinut naleqqutissasoq. Qalliunerusumik siunertaq tassaavoq atukkat uterteqqinneqarnissaasa qulakkeerneqarnissaa.

§ 19-imut

Aalajangersagaq, Nunatta Atuagaateqarfianut kommunillu atuagaateqarfiannut atuuttoq, Inatsisartut peqqussutaanni atuuttumi § 12f-imik ingerlatitseqqiineruvoq, pineqarlunilu atuisut ataasiakkaat atorniarsinnaanerisa killilerneqarnera.

Aalajangersakkami atuagaateqarfiit ataasiakkaat sillimmataat, assersuutigalugu atuagaateqarfiit atuakkanik aalajangersimasunik uninngasuutaat eqqarsaatigalugit, atorniartartut atorsinnaasaat inniminnersinnaasaallu katillugit atorsinnaasaasa killilerneqarnissaannik atuagaateqarfiit ataasiakkaat periarfissinneqarput. Aalajangersakkami

siunertaavoq atorniartartut allanik atortunik atorniarsinnaanerat ajornarsitinniarnagu atorniartartut ataasiakkaat atortut atugaasa amerliartornissaasa pinngitsoortinneqarnissaa.

Aalajangersakkami tassunga peqatigitillugu siunertaavoq angerlaallugit atukkat annertunerusumik kaaviiaartinneqarnissaasa qulakkeerneqarnissaa.

§ 20-mut

Aalajangersagaq Inatsisartut peqqussutaanni atuuttumi § 12e-mik ilaatigut ingerlatitseqqiineruvoq, siunnersuutigineqarporlu atuagaateqarfiit ataasiakkaat malittarisassaannik aalajangersaasarneq pillugu aalajangersakkamik ilaneqassasoq.

Imm. 1-imut

Nunatta Atuagaateqarfia kommunillu atuagaateqarfii atuagaateqarfiit atornissaannut piunasaqaatit pillugit atuisunut ilisimatitsisarnissaannik aalajangersakkami pisussaaffiliisoqarpoq. Tassunga atatillugu pingaaruteqarpoq minnerunngitsumik piunasaqaatit unioqqutinneqarnerisa kingunissaannik atuisut ilisimatinneqarnissaat. Ilimagineqarpoq ilitsersuineq oqaasiinnartigut ilitsersuinikkut allaganngorlugulu ilitsersuinikkut pisassasoq.

Atorniarnermut ilisarnaat imatut paasineqassaaq atorniarnermut uppersarsaat kinaanermilluunniit uppersarsaat alla atorlugu angerlaassilluni atorniarnermi periuseq. Apeqqut angerlaassilluni atorniarnermut atuuttumut taamaalilluni tunngassuteqarpoq. Atorniarnermut ilisarnaat suna atorneqassanersoq atuagaateqarfiit ataasiakkaat aalajangissavaat.

Imm. 2-mut

Aalajangersagaq nutaajuvoq siunnersuutigineqarlunilu atuagaateqarfinnik atortuinillu atornermut atatillugu malittarisassat maluginiagassat aalajangersornissaanut erseqqarissumik pisinnaatitsinermik pilersitsiniarluni ilanngunneqassasoq. Uani pineqarput malittarisassat atuisut atuagaateqarfirmiikkaangamik malitassaat. Malittarisassami angerlaassilluni atorneq, qularnaveeqqusiineq, akiliutit il.il. pillugit aalajangersakkat ilaanngillat. Malittarisassat tassunga taarsiullugu tassaapput nipiliorneq, nerineq, imeruusaatitorneq il.il. siunertaallunilu atuagaateqarfinni ataasiakkaani meeqqat aamma toqqissillutik najorsinnaasaanni eqqissisimasumik isumannaatsumillu avatangiiseqarnissamut tunngaviliinissaq.

Malittarisassanik unioqqutitsineq atuisup piffissami sivikitsumi atuagaateqarfirmiit anisinneqarnissaanik kinguneqarsinnaavoq. Unioqqutitsinerni annertunerusuni pisaqattaartunilu atuagaateqarfik § 17, imm. 3 malillugu atuisumik piffissami killilimmi iseqqusiunnaarsinnaavoq.

Imm. 3-mut

Atuisut malittarisassanik atuagaateqarfiit atortuunik atuinermi atuuttut ilisimasaqarnissaat aalajangersakkami qulakkeerneqassaaq. Atuagaateqarfimmi saqqummiussineq malittarisassamik ajornanngitsumik takuneqarsinnaasumut nivinngarlugit imaluunniit saaffiginnittarfimmi il.il. naqitaaqqat ilillugit pisinnaavoq. Malittarisassat tunniunneqartarnerat, assersuutigalugulu atuisut nutaat atorniarnermut uppernarsaatinik il.il. tunineqaraangata, atuagaateqarfik pillugu ilitersuutinik naqitaaqqanik tunniussinikkut aamma naleqqussinnaavoq.

§ 21-mut

Aalajangersagaq allaqqasut Inatsisartut peqqussutaanni § 12-imi pinngitsoorani tunniussisussaataaneq pillugu aalajangersakkanik ilaatigut ingerlatitseqqiineruvoq, maannakkullu siunnersuutigineqarpoq atortut naqitaanngitsut aamma ilanngunneqassasut. Kalaallit kulturikkut kingornussaannik kingulitta pissarsisinnaanissaasa qulakkeerneqarnissaa aalajangersakkami siunertaavoq.

Imm. 1-imut

Aalajangersagaq isumaqarpoq pilersinneqartunit tamanit Kalaallit Nunaanni saqqummiunneqartunit pingasut Nunatta Atuagaateqarfianut aalajangersagaq naapertorlugu pinngitsoorani tunniussivissaasumut tunniussisoqartassasoq. Maannakkut siunnersuutigineqarpoq assersuutigalugu atuakkat, naqitat il.il. saniatigut cd-rommit, cd-t, dvd-it, videot allallu naqitanngornagit saqqummersinneqartut aalajangersakkami ilanngunneqassasut. Aalajangersakkami taamaallaat pilersitat saqqummersitat ilaapput, missingiutillu pineqaratik, tunniussisussaataanermilu saqqummeeriaaseq apeqqutaatinnagu maannakkut atuutilerpoq. Aalajangersagaq malillugu pilersitamik pineqartumik naammassinnilluni suliaqartoq tunniussisussaataavaoq. Tamanna nalornissutigineqassappat saqqummersitsisoq tunniussisussaataassaaq, assersuutigalugu atuakkanik saqqummersitsivik pilersitsisorluunniit.

Imm. 2-mut

Aalajangersagaq nutaajuvoq aammalu pisinnaatitsineq pillugu aalajangersagaq pineqarluni. Naalakkersuisut matuma kingorna nalunaarusiornikkut pinngitsoorani tunniussisussaataanerup imm. 1-imi taaneqartup annertussusaa pillugu malittarisassiorsinnaapput, tassunga ilanngullugit piffissaq tunniussivissaq ilusissaallu. Radiomi tv-milu aallakaatitassianik, internetimi quppernernik il.il. aamma pinngitsoorani tunniussisussaataanermik annertusillugu aalajangersagaq atorneqarsinnaavoq.

§ 22-mut

Aalajangersagaq nutaajuvoq Nunatta Atuagaateqarfiatalu aningaasalersorneqarnera allaqqalluni.

Imm. 1-imut

Nunatta Atuagaateqarfiata aningaasalersorneqarneranut tunngavik aalajangersakkami allaaserineqarpoq, taakkulu annerusumik nunap karsianit tapiissutaapput.

Imm. 2-mut

Aalajangersagaq isumaqarpoq tapiissutit annertussusaat Inatsisartut kisimiillutik aalajangertaraat taamaalillutillu Nunatta Atuagaateqarfiata ingerlatsinerani aningaasaqarnerani sinaakkutit killilersorlugit.

Imm. 3-mut

Isertitaqartarluni ingerlatsineq pillugu pisortat ingerlatsinerat pillugu inatsisini periutsinut nalinginnaasunut aalajangersagaq attuumavoq, Nunatta Atuagaateqarfiata tamassuma kingorna ingerlatsinermi nalinginnaasup pissusissamisoorumik kinguneranik tapiissutit isertitanik ilasinnaavai, tassanilu missingersuutit pillugit malittarisassiami tamanna aalajangersakkat isiginiarneqassapput. Ingerlatsinermut isertitsissutaasartumut assersuut tassaasinnaavoq atuakkiortunik oqalugiartitsineq atuisut isermermi akiliinerisigut tamakkiisumik ilaannakortumilluunniit aningaasalersorneqartoq. Atuagaateqarfiit akerlianik suliffeqarfinnut namminersortunut toqqaannartumik unammillernissaat inertequtaavoq, assersuutigalugu atuakkanik CD-nilluunniit aningaasarsuutigalugu tuniniaasarnikkut.

§ 23-mut

Aalajangersagaq nutaajuvoq pineqarlunilu kommunit atuagaateqarfiisa aningaasalersorneqarnerannut tunngaviit, taakkulu maannakutut kommunit missingersuutaat aqqutigalugit aningaasaliissutigineqartunit tapiissutineersuusarput.

§ 24-mut

Aalajangersagaq nutaajuvoq kinguneraalu pineqaatissiisarnerit pillugit aalajangersakkat ataatsimoortinneqarnerinik. Aalajangersagaq ilanngutissallugu tulluarsorineqarpoq pinngitsoorani tunniussisussaataaneq pillugu aalajangersakkat unioqqutinneqarneranni pineqaatissiissutigineqarsinnaaniassammata taamaasillunilu malittarisassat malinneqarniassammata.

Pineqaatissiisarnerit akiliisitsinermik kinguneqarnera Namminersorlutik Oqartussat pineqaatissiisarnermut malittarisassaanut naapertuuppoq, tassanilu pineqaatissiisarnerit annertunerpaamik akiliisitsinermik kinguneqartarmata.

§ 25-mut

Aalangersakkami siunnersuutip piffissaq atuutilerera piumasaqaatillu annertunerusut allaqqapput, tassunga ilanngullugu Inatsisartut maannamut peqqussutaata atorunnaarsinneqarnera.